

四庫全書

集部

欽定四庫全書

集部
薛荔園詩集卷四

詳校官監察御史_臣周元良

侍讀_臣孫球覆勘

總校官中書_臣朱 鈐

校對官中書_臣吳甸華

謄錄監生_臣黃 佑

欽定四庫全書

薛荔園詩集卷四

明 余翔 撰

七言古詩

遊九曲

武夷山水清且奇我今鼓棹一遊之三十六峰何縹緲
溪流九曲更逶迤樂奏幔亭豈可聞琪花瑶草自紛紛
幡幢一舉虹橋斷令人空憶武夷君把酒遙看玉女峰

孤標壁立秀芙蓉空中鶴舞三珠樹海上鯨鳴萬壑鐘
吾生癖性愛烟霞逢著名山興不賒為報山中龍臥者
何時來訪赤松家

送游宗謙之吳謁王長公

黃金散盡餘顏色游生拓落無人識酒徒劍客日相隨
醉眼看人醒不得自傷世路知音稀山水含情老布衣
不分侏儒飽欲死恢諧曼倩却長饑聞道王郎稱作者
陽春白雪和彌寡擔簦躡屩往從之操觚直欲追大雅

三吳詞藻蔚相望王郎凌厲獨擅場顧盼一言光日月
雄視千古神飛揚游生此去何落落扁舟遙向姑蘇泊
漫去按劍暗投珠最善運斤工減堊王家兄弟傲當時
意氣相傾山可移一附青雲名便起歸來握得雙劍光
陸離對酒長呼大小兒

陪蔡使君遊何氏園亭同方許二生作

吾徒落魄不可羈縱橫白眼傲當時愁來散髮歌逾壯
激羽流商和者誰使君於我稱同調詩愛青山吟謝朓

春風何處足歡娛城南桃李迎人笑停午驅車過草堂
開樽湖上咏滄浪鶯入垂楊聲乍轉人遊芳草興何長
席上懸河辯有口賓主陶然嚼大斗諸生侍側最風流
飛揚跋扈真吾友臨淵徒有羨魚情盤中那得五侯鯖
少年行酒歌不歇爭雄取醉似長鯨少選松間日欲落
秉燭還傾鸕鷀杓灌夫罵坐未為狂步兵入厨差足樂
人生百歲似川徂即今不飲胡為乎路傍古墓應多少
世上浮名竟有無宇宙寥寥君與我莫笑相逢苦不早

兒童拍掌唱銅鞮接羅何惜山公倒

贈別駕陳觀甫之金陵

別駕陳公性喜酒結交余生良不偶南粵相逢情更親
時時醺我以大斗鴻鵠胡為困網羅功高不賞謗偏多
北走長安列冤狀功名畢竟悲蹉跎歸去溫陵混鹿豕
萬事悠悠長掩耳草衣自分樂忘憂蔬食安知怨沒齒
年來採藥駐紅顏杖藜往往遍名山予亦尋真隨所適
扁舟共泛武夷灣明朝蹤跡分吳楚擔簦躡屨俱逆旅

卷四
沽來濁酒且為歡後會不知復何所金陵佳麗帝王州
燕子鳳皇足勝遊白雲一片三山下萬里長江九派流
別駕紅顏還採藥翩翩騎著揚州鶴丹成白日上青天
肯令狂生長寂寞

謁子陵祠

若有人兮山之曲撫長松兮倚修竹樂衡門兮棲遲臨
清流兮卜築謝軒冕於當途兮結隱淪於空谷豈無九
五之戀窮交兮一舉吾慕乎黃鵠唯桐江之潺潺兮逝

晝夜其相續托漁釣以終身兮安所取天下之桎梏瞻
飛鴻之冥冥兮聽松風之謾謾彼神龍之蟠九州兮豈
其與蝦鰕而相徵逐使鳳凰可得而羅兮又奚異雞鶩
之爭飲啄邈哉高風留此芳躅上有許由之耳兮下有
嚴陵之足酌雨露以為漿兮燃日月以為燭漢家宮殿
草離離七里依然烟水綠

酬許希旦鄭兆采陳堯勛方子韓四子贈別之作
余生落落誰與友大抵猖狂常使酒自分茂陵四壁貧

交遊往往嗟白首小技雕蟲豈有名一時攬結弟和兄
寂寞但留玄草在從他白眼漫相輕途窮無奈步兵哭
却向天涯走碌碌若道窮交不世情足音誰復到空谷
許生鄭生氣雄哉授我明珠海上來慷慨片言露肝膽
縱橫萬里走風雷更有方生歌白雪聽之不覺聲悲咽
陳生尺牘雅稱奇三嘆瑤華追往哲吾黨風流異少年
中原鞭弭誓周旋賦擲金聲元不賤結交寧論橐中錢
嗟彼駸駸肉食者其人齷齪其音啞一言不合便拂衣

安用日夕弄杯斚河梁別酒見交情倚劍當年氣不平
須賈袍仍憐范叔漸離筑自和荆卿我今扁舟向何所
豈為生離淚如雨弟兄湖海坐相望眼底兒曹足與語

壽叔母朱孺人六十初度

天馬山中多峭石凌雲帶雪幾千尺朱家卜世住其間
丈夫女子聲赫奕孺人婉婉適余郎一朝先逝稱未亡
上事公姑下撫子瑩然皎潔等秋霜乃今行年且六十
有子承歡孫玉立華堂開燕進瑤觴紫芝騁騁青鸞集

君不見扶桑之東滄海流
潮汐何曾一日休
朱家有女
余家婦名並江山萬古留

贈道昭榮膺冠帶

我家三洲環大海
深山秀色長不改
中有伊人抱幽貞
木石與居齊畏壘
念母當年矢栢舟
遺賑呵護不勝愁
擬學代耕竊升斗
劬勞萬一何能酬
感激慈闈不逮養
謁銓何心裝北上
棲遲丘壑以窮年
捧檄毛生作何狀
自曾大父壽而昌
簪纓兩世有輝光
自分雖然甘草莽

鴈門冠蓋焉能忘一命初承歡此日謁廟趨踰儀秩秩
有子能文稱國珍會見明時償萬鎰華堂奕世生春色
送鄭文蔚之豫章訪用晦王孫及方比部士功兄

弟兼北上請先司馬公卹典

鄭生胸中富二酉寂寞摛文嗟覆瓿一區自分老衡門
干謁肯向天涯走四十無聞邨足憂締交我輩擅風流
熟讀離騷痛飲酒安知吾世有窮愁朝指豫章向余別
言向通家心轉切長裾豈為曳王門授簡梁園歌白雪

君家司馬昔日轄西江謀折淮南氣不降詔起重來持
節鉞父老如雲慶此邦鄭生此行豈蕭颯豫章猶有迎
徐榻滕王閣上感遺蹤司馬風聲滿閭闔伊昔世廟登
極時紛紛議禮勢相持司馬屹然石不轉疏歸豈荷聖
朝知於時吾鄉林司寇使者交馳氣輻輳二公垂老罷
賜環蜀人執政寢其奏鄭生北望黃金臺一疏籲天手
自裁臣祖先朝功未錄倘垂日月照蒿萊燕市酒人多
屠狗相逢繫馬誰家柳書報九重及早歸遲爾山中娛

白首

石梅行和鄭給舍作

何物崢嶸如列戟枯株云是羅浮魄漫言斑剝老蓬蒿
幻作乾坤萬古之奇石初疑大孤小孤江上來凌雲露
出雙峰碧又疑漢庭承露截金莖勢欲擎天移太液瘦
影參差最有神姑射仙人茲託迹胡不藉爾作和羹棄
置丘園良可惜憶君昔侍承明廬諫獵恢諧金馬客歸
來學灌漢陰園與爾盤桓朝復夕君不見金谷繁華鬪

一時綠珠墜樓竟何益又不見平泉醒酒石可憑須臾
轉入他人宅世事玄都觀裏花搖動春風葵與麥何似
君家二石梅餘比虬龍心比鐵屈蟠不受刀斧災偃蹇
寧為風雷擊根連庾嶺苔為衣璞蘊荆山雲作幘巨靈
華頂擘爭奇處士湖邊吟轉劇把酒狂呼繞石行一枝
肯寄長安陌我亦社樹稱不材尋常頗有林泉癖為爾
交情數往來歲寒心事稱莫逆

九鯉湖歌招道士

九鯉湖中山水深九鯉仙人何處尋我來此地訪遺跡
西風吹雨晝陰陰石牀丹竈依然在珠簾瀑布長不改
跨鯉仙人去杳然桑田幾度變滄海齋心初向水晶宮
遙見青童玉女下雲中鸞鵲馭應無數中有紅顏綠
髮之仙翁儼然授我金丹訣沆瀣盤中和玉屑我也再
拜三復之臨風直欲朝天闕君不見秦皇遣士訪蓬萊
徐市樓船去不回驪山刑徒七十萬空餘金槨葬寒灰
又不見漢武求仙開桂館文成五利朝中滿十二樓成

海內虛輪臺詔下悔何晚仙分由來不偶然古人遺事
今人傳何如此地褰瑤草左挾洪崖右偃佺羽衣道士
開笑口舉杯酌我山中酒百年超忽若飛梭安用虛名
垂不朽我欲尋真學赤松飄飄與爾駕茅龍湖中采却
三花秀養得仙人冰雪容道士道士可相從

龍泉歌贈黃堯衢

黃生落筆驅飛電詞賦未逢狗監薦腰間佩劍不知年
三尺龍泉鐵一片此鐵淬自昆吾溪切玉縱橫如切泥

精爽時時騰碧漢寒芒夜夜伴青藜風胡不作歐冶死
古獄劓來今在此匣中偃蹇一悲鳴水掣鯨鯢山銚兕
虎頭綬解龍鱗開魑魅魍魎見之且號哀千秋神物風
塵裏望氣何人復姓雷君不見淮陰未遇時碌碌甘受
少年胯下辱一朝仗劍起登壇佐漢功成建大纛黃生
年少氣如虹節俠分明國士風不分鉛刀稱一割直將
長劍倚崆峒我為劍歌君為劍舞慷慨歔歔泣下如雨
千金劍術高自許肝膽終當結明主不見東北烽烟飛

白羽

豫章歌為豫章蔡伯華作

君不見豫章之材輪菌離奇陰百畝不知開闢以來盤
踞幾千古羊角長棲萬里風龍鱗慣作四時雨鬼神呵
護誰敢傷公輸離婁遇之失其斧徂徠長松差可倫區
區拱把桐梓何足數此物胡為播海涯合宮清廟工無
取大材難用古云然偃蹇於今若崕嶬君不見蔡澤相
印捐一朝輕肥何勞問唐舉又不見咸陽傍徨就五刑

李斯空羨倉中鼠，世事多如蒲柳姿。
望秋先零歸無所，我已自分老蓬蒿。
汝博一官復齟齬，三山山下笑相逢。
若為楚歌吾楚舞，五月閩南荔子丹。
剝來其肉白如乳，把酒狂呼天地間。
誰為夔龍誰為巢許，落落風塵吾與汝。
吁嗟乎豫章大材，樗不材豈終與尋常草木同朽腐。
登鳳凰臺放歌

秣陵誰築鳳凰臺，玉砌雕闌亦壯哉。
曾說當年登太白，西望長安落日哀。
太白昔侍金鑾殿，草奏才高承帝眷。

被讒一旦流夜郎萬里飄零淚如霰俠氣縱橫隘九州
金雞赦罷學浮丘翹首青天不可問登臺欲跨鳳凰遊
鳳凰一去幾千載浩浩秦淮東倒海阿閭功名縱可書
何似一杯澆塊壘青蓮居士謫仙人風塵落落苦其身
騎鯨采石捉明月天門謁帝誰能馴我來訪古心淒楚
鳳凰太白俱高舉高臺今屬貴人家白雲一望空延佇

武夷山歌贈金公子魯

金學曾嘗為
福建撫院

三十六峯開洞天大王幔亭相延連曾孫宴罷聞仙樂

虹橋一斷何茫然停橈試一問玉女青苔如黛挂暮烟
金雞洞裏晝寂寂乾魚祠前草芊芊懸崖峭壁更窈窕
瑤草琪花沿溪遠分明有路到桃源漁郎去後來人少
武林名公神仙客手持珊瑚長七尺坐笑胡牀淨妖氛
日御茅龍生羽翮幃帷高映萬山青榮戟遙臨溪流碧
自從寶籙握丹經時向爐中煉金液丹經金液會有期
側目風塵轉可悲經綸須借擎天柱莫問架壑來何時
祇今建節控上游須臾膏澤遍九州烟霞不礙謝傳屐

風月還傳庾公樓北望佳氣日氤氲鵷行豈逐鷗鷺羣
功成謁帝朝金闕藥苗九曲正續紛請看麟閣圖形後
他時重訪武夷君

戍婦詞

妾本邯鄲良家女花開花落佳村塢輕紅薄黛抹蛾眉
贏得肌膚如香杜可憐二八嫁夫君疇知蕩子樂從軍
玉闥數載無消息空勞纖手學迴文迴文一字心一片
可惜相思不相見方將意思托飛鴻復恐淚痕羞語燕

昨夜嚴霜折井桐
雨階衰草怨悲風
深閨自抱生離恨
邊塞寧論征戰功
紅顏命薄無如妾
絕向粧臺粘寶靨
孤燈夜夜理寒衣
無數寒衣猶在篋
夢魂偶爾到邊隅
見君綺帳結流蘇
耳畔忽驚笳鼓急
枕上居然伴小姑
沙塲白骨肥青草
丈夫薄命難自保
人生豈必諸侯王
富貴何如得偕老
寄言蕩子好回頭
妾今朝暮上高樓
歸時莫怪容顏異
婦人耐得幾回愁

七言律詩

雨後問林翼甫病

城南伏枕已經秋一雨寒天兩地愁
司馬肺應蘓夜色沈郎腰要損風流
門前流水遙通海雲裏青山半入樓
欲為故人賡七發觀濤好作廣陵遊

答程慧父

名拭通政使

高齋尊酒見通家投贈新詩矚薜華
虛左偏迎公子駕傾城初浣美人紗
濤生滄海三江近雨遍荒村五柳斜
興到扁舟乘月色青門猶有故侯瓜

贈江侍御

疏乞歸來隱薜蘿
五花曾憶舊鳴珂
山林自愛羊求在
京路焉知絳灌多
桂樹秋寒香縹緲
雲門月淨影嵯峨
那知千里登龍日
車馬蕭然任可羅

贈夏陳州以道

使君五馬領專城
臥治淮陽更有聲
郡閣三年看下鳳
檐帷千里聽遷鶯
崢嶸色並衡山壯
浩蕩波涵夢澤清
尊酒相傾憐此日
孤鴻南去倍含情

贈郭子章左轄

岳牧才名動九州閩藩三載奠金甌
紫宸萬國朝宗日
滄海無波保障秋望重汾陽膺帝寵
澤深棠樹起民謳
即看劍履趨三殿竹馬難留郭細侯

送友人

清朝侍從擅風流孤憤長懷漆室愁
自是賈生輕絳灌
敢云中散薄殷周九天鵬翼垂雲海
五色龍光射斗牛
薇省花開供坐嘯月明清興在南樓

秋夜集王汝存宅同趙仁甫作

一尊月下罄交歡
子夜歌來白苧寒
烏鵲南飛棲未定
關山北去路偏難
此時玉樹人相倚
何處金莖露可餐
對月未須辭酩酊
百年風雨幾回看

滕王閣

高閣峻嶒四望開
凭欄秋色客遲回
城臨二水吳天合
鴈帶孤雲楚澤來
翼軫何人懸彩筆
江湖有客罄深杯
霓旌不見風流盡
依舊西山暮雨哀

送方子及謫滇南

才名誰似漢田郎起草何人謫瘴鄉
芳杜佩還紉帝子中山篋豈示君王
符分虎竹雲霄迥俸給魚鹽道路長
一酌昆明池上水恩波猶自憶含香

其二

迢迢東海一波臣路出盤江更問津
寒食蘼蕪愁片雨春衣楊柳拂輕塵
青雲謫去還何日白雪歌來和幾人
我亦乾坤憔悴者不堪澤畔賦靈均

酬立朝叔秋日贈別之作

諱應俊

豈是潯陽五柳家柴門生計老烟霞
玄經不廢愁中草青鬢俄驚病裏華
海戍雲寒遙度鴈楓林月白亂啼鴉
仲容飄泊天涯去竹下銜杯興轉賒

同邵夢弼王重甫林貞濟陳振狂登烏石山作

望裏青山一片孤登臨長嘯共吾徒
萬家烟樹還明滅九月江鴻乍有無
滄海微茫虛蜃氣白雲搖曳隱浮屠
尊前俱是悲秋者憔悴何如楚大夫

林天廸席上呈諸同社

風流詞藻郢中才
酒熟黃花對客開
高閣秋陰寒薜荔
一簾霜葉點莓苔
醉來澤畔如相問
賦就江南祇自哀
意氣千秋吾黨在
不妨月下數銜杯

懷仁甫

歲暮柴門生事微
灌園久息漢陰機
湖邊流水烟初暝
樹裏斜陽鳥乍歸
中酒誰憐嵇叔夜
裁詩獨憶謝元暉
鴈鴻遙隔三山外
悵望江天片月飛

得王重甫書却寄

題來尺素越王城八月江空鴈一聲
栗里只宜棲處士
彛門誰許過侯生
青山贈爾烟霞色
白社招余海岳盟
為報重陽風雨近
黃花濁酒遲縱橫

秋日酬鄭給舍

二首

海上風濤把釣竿
科頭懶著竹皮冠
蛾眉此日空題扇
猿臂何人為築壇
天地百年孤憤在
闕山一曲太行難
布衣掩骭秋無恙
誰罄平原十日歡

其二

窮愁誰問楚狂生得爾相看意氣橫
劍識雌雄風雨合歌來慷慨鬼神驚
羣峰翠抱空中閣片月秋懸海上城
一自逃名棲谷口吾徒敢負薜蘿盟

送高五之山東謁方左轄

二月芳郊雨乍晴隔林求友聽鶯聲
文章欲借中原色裘馬初含萬里情
蹈海誰當天下士談經直過濟南生
紫薇花下邀歡後嘯倚天門署姓名

元日和方子及雪霽

九衢車馬逐輕塵，歲月催人兩鬢新。
律應青陽來昨夜，盃傳濁酒媚佳辰。
玉珂色映秦淮雪，綵筆題殘漢署春。
一自仙郎裁郢曲，眼中誰是和歌人。

同戴朝賓姚在質登壺公山

太守風流謝永嘉，開山獨愛白雲斜。
攜來彭澤先生酒，醉殺天台二女花。
拄杖孤峰低日月，揮毫五色散烟霞。
應悲城郭多生事，欲駕仙人白鹿車。

贈居易叔

木蘭流水繞江村
旭日東升望海門
積氣有時餐沆瀣
通津何處涉崑崙
一庭花萼春相媚
四壁圖書細討論
最是承歡憑戲綵
南溟初化北溟鯤

送蕭給事奉使琉球

使者才名青瑣聞
島嶼五月信南薰
舟中玉節鯨鯢避
海上金函雨露分
萬里波濤澄漢月
九重宮闕渺燕雲
彭湖一夜秋風起
草奏還朝謁聖君

同杜子賢陳觀甫游宗振宿天游菴

樓閣峩峩接太虛
臨風登眺客來初
饑餐玉女青精飯
醉叱仙人白鹿車
驚鷺參差雲外聳
芙蓉隱映月中踈
知誰姓字登金籙
齋沐清霄謁帝居

讀弇州集贈王元美先生

四首

一臥滄江幾度春
朝朝搦管氣如神
轅門歸去誰推轂
藝苑傳來自斷輪
千里馬蹄堪獨老
九州龍性總難馴
玄經草就揚雄宅
載酒還容問字人

其二

先朝一疏乞巖阿再起中原竟若何
楚澤魚龍驕白日
吳江風雨滿青莎
翟公門靜堪羅雀
逸少書成欲換鵞
何物千秋名不朽
尋常附驥一相過

其三

秣陵佳麗帝王州
京兆奚為厭壯遊
馬曳吳門還匹練
弓藏范蠡合扁舟
荷衣楚楚湘纍怨
雪調泠泠玉女愁
漫道出山稱小草
弇中高臥是丹丘

其四

中原諸子氣爭雄
君自縱橫擅國工
燕市飛虹曾貫日
郢人滅堊已成風
寧論猿臂淹諸將
祇為蛾眉妬六宮
林下未須嗟偃蹇
江湖萬里一冥鴻

秋日寄題姚在質草草亭

君家臺館似濠梁
幾度論詩到草堂
春社酒醒雙燕語
墨池雨過百花香
桐陰滿地吟秋色
竹影留人醉夕陽
可是名園幽興熟
九華無日不相望

秋夜懷用晦

江臯無夢不相親
憶汝難禁月色新
執轡彛門金結客
採芳湘水玉為人
書從千里來無恙
佩是雙龍合有神
安得移家南浦上
小山日結桂叢鄰

寄堯勳

君家住近鳳凰山
高閣峻嶒幾度攀
問字曾過滄海上
題詩多在白雲間
扁舟臥病囊垂罄
短褐悲秋鬢欲斑
回首元龍樓上月
幾時尊酒破愁顏

送葉明府入計

北望燕山紫氣生
翩翩車騎出江城
朝元雙鳥飛仙令
受計三年寵上卿
峽口寒濤催去鷁
關門殘雪映行旌
漢庭經術推高第
海內爭傳卓魯名

春日 和蔡伯華題瑞巖之作

海上孤峰削不成
春來延眺薜蘿清
杯傾竹葉青山醉
石掃蓮花彩筆橫
飛蓋低松雲欲墜
行歌出谷鳥初鳴
孤臣莫灑中原淚
一謫長沙萬古名

客中書懷寄鄭給舍

天涯風雨倍含情，鴈度關山客夢驚。
不見綈袍憐范叔，空懷白璧老虞卿。
笛吹楊柳秋聲轉，月冷蓬蒿夜色生。
却憶木蘭詩社長，幾回樽酒興縱橫。

寄贈方子舉子至兄弟

幾度相過醉草堂，別來湖海迥相望。
連城並抱荆山璧，雙佩還投楚畹香。
詞客憑誰歌白雪，酒徒漫自混高陽。
鴟夷踪跡扁舟在，翹首青雲氣頗頡。

同周九達游宗振集用晦王孫芙蓉園得華字

青藜高閣抱龍沙
客向王門校五車
玉樹舊傳桐葉地
天香秋散桂叢花
鄒枚授簡生春色
牛斗開函鬪物華
對酒試論千載事
建安七子起誰家

送宗振之江西兼東用晦王孫

囊山山下白雲生
慷慨看君賦遠行
峽口孤帆飛建水
斗間雙劍指豐城
江湖不盡窮愁淚
風雨其如去住情
到日芙蓉花正好
西園彩筆競縱橫

送陳守巽之浙臬

名誥嘉靖乙丑進士

使君聲望起雲霄，高隼搏風健翮遙。
度嶺行春曾露冕，錢塘繫纜正觀潮。
月明海國鴻初度，秋到江城柳未凋。
若向西湖探勝跡，孤山猿鶴為誰招。

送林敬夫明府之粵中

名民止萬歷甲戌進士，余同年友也。

茂宰風流入計年，飛鳧歸帶薊門烟。
歡承萬石開春酒，曲引雙成被管絃。
潘縣花深迎墨綬，豐湖月白泛樓船。
憑君覽勝羅浮上，石室雞鳴海日懸。

寄用晦王孫兼東余德甫憲副

龍沙雲樹望依微
楚水閩山尺素稀
公子風流蘭作佩
野人生計薜為衣
客來北海尊常滿
月出西園蓋並飛
為報芙蓉同社侶
豫章幾度夢中歸

答陳子卿見寄

五月披裘慣負薪
居然滄海一窮鱗
若非芳佩貽公子
誰見綈袍戀故人
萬里扶搖鵬擊水
九衢蹀躞馬飛塵
從容碣石談天日
還憶江南白雪春

客中贈游宗振

落魄江湖一布衣，閒來說劍氣雄飛。
已看麗藻裁芳杜，况復清光映少微。
世上浮名雲共薄，天涯多病鴈來稀。
彈歌不是吾徒事，滄海垂綸有釣磯。

同戴朝賓陳觀甫吳潛夫陳叔理泛舟晉安城西
作

參差樓閣鏡中開，客自風流載酒來。
山勢似浮三竺寺，荷香深襲百花杯。
商歌競逐滄浪起，野服俱成薜荔裁。

我輩相逢情不淺
停梳還上越王臺

懷立朝叔

八月涼風動客衣
多愁又與故山違
天涯夜冷歌中露
海上星高望少微
颯颯秋聲黃葉下
迢迢雁影白雲飛
滄江獨坐垂綸者
為羨鱸魚入饌肥

和柯克叟哭方伯徐子與之作

龍沙傳道歲星徂
國士潛然淚欲枯
鄴下文章身後振
山陽風雨笛中孤
愁深彭蠡來寒雁
夢繞苔溪噪夜烏

一束生芻人似玉憑君磨鏡赴長途

贈林晉伯

才子風流漢長卿凌雲誰薦子虛名池邊搦管題春草
花下銜杯聽早鶯千里霜蹄驕歷塊六宮粉黛避傾城
穿楊梨嶺君家事伯仲東山更有聲

送李孝甫太僕還明州兼報沈嘉則

為愛名山入武夷相逢海上共題詩漫言仙令飛鳧下
曾似官曹問馬知劍浦波搖青雀影鏡湖秋結白雲期

四明狂客如相問黃鵠翩翩任所之

贈林貞濟

詞藻翩翩思不羣五陵年少幾如君
開函長拂青萍劍擲管還題白練裙
汗漫圖書探海岳縱橫鞭弭叱風雲
相逢況是黃花候斗酒寧辭醉夕曛

壽許隱君為希旦尊人作

汝南冠蓋集如雲聖代逃名獨有君
濁酒頻招陶處士新詩雅愛鮑參軍
蒲生九節仙人授衣染三花玉女分

燕市黃金高索駿渥洼龍種自空羣

贈杜使君

元凱聲華天下聞東南轉餉借夫君
五花曾擁荊州節千里猶傳渤海文
迹混風塵稱吏隱名隨霄漢出人羣
聖明名對還今日坐見芝泥下紫雲

林大合招飲鰲峰亭同邵夢弼王重甫作

汗漫相逢秋色深興來高閣共登臨
雲開睥睨羣峰出日隱松杉獨鳥吟
流水尊前調綠綺寒花籬畔散黃金

嬋娟一片城頭月相對狂歌思不禁

周允仁招飲澄瀾閣有懷方伯徐公

參差樓閣俯滄洲詞客翩翩結勝遊
山色迎人來樹杪鷗羣對酒散沙頭
風敲萬竹秋聲急雲斂千峰月影浮
蔽芾甘棠歌勿翦采芳無計薦南州

贈郡侯陸公奏最

二首

三載分符奏九重官曹舊屬大司農
政和海上來神雀名起雲間識士龍
大楚雄風移七澤全閩膏雨遍千峰

懸知早晚徵黃詔曳履還聞長樂鐘

其二

三楚才名迴不羣漢廷治行孰如君南方地僻停千騎
北闕天遙戀五雲樂奏幔亭鸞鳳曲佩搖劍浦斗牛文
自憐偃蹇山中者日聽謳歌醉夕曛

贈鄭觀察

封書早奏建章宮攬轡閩中職事雄使者還持三尺法
行人爭避五花驄分屯遠近籌邊策轉餉東南煮海功

匣裏慚非明月璧憑君一盼氣如虹

趙仁甫招飲平遠臺

一尊與客醉孤亭檻外羣峰似列屏最愛風流招白社
還看斗氣射青萍秋深臺館花爭發月落江城酒未醒
寂寞從人嘲不解侯芭已識太玄經

贈王汝存

意氣看君跌宕多相逢且莫嘆蹉跎山陰興劇還看竹
池上書成幾換鵲作賦才名工白雪開尊風雨醉青蘿

蹇予亦是踈狂者把臂何妨共嘯歌

集天廸藂桂堂呈仁甫汝存子脩

松桂森森雨乍晴客來湖海氣縱橫壺觴不減山陰興
詞賦還齊鄴下名曲徑竹搖寒月影空庭鴈度朔風聲
可知今日蓮花社也結柴桑漉酒生

送陳中丞之楚

紫泥遙下建章宮開府旌旗楚甸雄六傳爭看新授鉞
五花共指舊乘驄洞庭靜聽釣天樂雲夢高誇羽獵風

興滿南樓秋夜月胡牀坐嘯幾人同

張將軍招飲芙蓉亭

東南分閫海無波愛客開樽醉薜蘿檻外烟雲紫玉樹
燈前星斗亂銀河干城長倚青萍劍樂府爭傳白苧歌
酩酊相看餘俠氣厭厭莫問夜如何

同仁甫汝存天廸登烏石山

海上西風萬木哀開樽相命一登臺寒江朝曳雲邊練
怪石秋生雨後苔片片飛鴻過睥睨亭亭雙樹倚崔嵬

天涯此日悲搖落作賦誰憐宋玉才

寄贈袁舍人

才子如雲滿建章
袁宏倚馬思飛揚
風傳玉漏鳴珂靜
露浥金莖拂袖香
起草明光垂日月
承恩太液重巖廊
雁鴻片片長江下
詞賦無忘寄柏梁

蒜嶺道中

雨過千峰翠欲浮
海門雁下歲寒秋
雲籠遠樹烟初散
雪壓斷橋水半流
豐芷只宜誇獨佩
隋珠何事暗相投

棲遲賴有青山在世路無勞嘆白頭

寄王太史

三山雲樹迴相望太史名高翰墨場
酒熟頻招彭澤宰詩成獨擅輞川庄
松蘿拂檻圖書靜猿鳥窺人歲月長
春到梅花開隴首故人欲贈阻河梁

懷汝存

江村臘月不勝寒獨坐高齋擁鵝冠
竹徑雲深人不到柴門雪暗歲將殘
歌來白石憑誰和淚盡明珠祇自看

回首越王臺上月幾時尊酒重交歡

懷天廸

憶昨看花醉草堂風流吾黨擅詞場千秋一附青雲色
中夜頻歌白露章愁滿關山逢雨雪夢來故舊倒衣裳
論文尊酒知何日獨立孤村送夕陽

寄子及

憶別春風贈柳條逐臣西去馬蕭蕭長瞻山下孤雲淚
漫折路傍五斗腰煮井何勞詞賦客含香還戀聖明朝

星軺萬里遊非薄題遍蘭津十二橋

寄夢弼

屏跡江村雨雪多歲寒生計竟如何
簷前雲影斜飛鳥湖上松聲急逝波
慷慨漫懷燕市筑猖狂還作楚人歌
君家五色瓜堪種不見咸陽臥索駝

寄伯華

憶昨秋風別晉安幾回離恨月中看
豐城龍劍何時合碧海蛟綃此夜寒
逐客蕭條蘭作佩故人潦倒鵑為冠

天涯多少相思夢尺素無由托羽翰

壽東山柯公為堯叟堯錫兄弟壽其尊人作

何來紫氣繞東山中有高人善閉關
桂樹幾叢娛白髮桃花千歲駐紅顏
杖移太乙看雲健曲奏陽春對酒閒
況復鳳毛池上滿文章五色競裁斑

同方子韓陳堯勲鄭文蔚宗希文集林廷濟迎翠
樓得銀字

南樓秉燭亂星辰把臂相看總酒人
落魄此生容大塊

浮名何物抵陽春
夜闌一部蛙聲急
雨歇千家月色新
但托鷗夷長取醉
百年容易鬢如銀

寄貞濟

臘月江村掩竹扉
蕭然四壁客來稀
雲橫遠樹千峰斂
日落平原獨鳥飛
末技雕蟲空自老
雄談捫虱欲誰依
越王山下梅花發
幾度尋君夢裏歸

酬柯克叟克錫兄弟

鷗夷蹤跡逐飛鳬
散髮扁舟泛五湖
自歎風塵交漸薄

誰憐金石調仍孤
防身長倚青萍劍
照乘爭探赤水珠
伯仲才名高北斗
雲間二陸一時無

寄重甫

雨雪霏霏萬井寒
南華讀罷倚闌干
梅花吹落江城笛
竹籜裁成野老冠
匣裏青萍空自拂
牀頭綠綺向誰彈
知君不盡山陰興
可買扁舟下木蘭

贈黃給諫

青瑣先朝侍從臣
歸來惟與白雲親
漢廷黨錮終何事

楚澤離騷合有人地卜刺桐心自遠歌裁鼓桂鬢初新
嗟余亦是耽奇者問字知君不厭頻

贈馮彞父

甬東有客擅才名落落臨邛一馬卿燕市未曾逢索駿
淮陽且自聽啼鶯馮驩奇策空三窟賀監清狂失四明
愛爾風流人似玉幾時獻賦沐金莖

贈車子仁

一從露冕晉安城共羨雄才出楚荆下鳳已徵循吏績

懸魚不減古人清
雙龍入夜星爭麗
五馬行春雪有聲
愧我老非徐孺子
豫章一榻獨含情

稽司理招飲夕佳園樓

二首

看山閣敞白雲中
官舍蕭然只數弓
花氣初飄千樹雨
鶴聲如和九臯風
呂安命駕情誰似
王粲登樓賦未工
退食從容瞻北斗
冷然直欲駕飛虹

其二

樓控黃華樹色陰
南薰一曲快登臨
官閒拄笏西山爽

客到開尊北海深
霧澤空齋多變豹
風清古木聽鳴禽
閣中山水諧心賞
倘許重攜焦尾琴

贈唐美承明府

列宿清光映翠華
人從海上泛孤槎
辭來栗里籬邊菊
看過河陽雪裏花
萬里橋通題柱客
五紵絲咏采桑家
自憐白髮愁難變
欲問仙人勾漏砂

贈巫維禎太學

羣峰矗矗水粼粼
南國長懷席上珍
中壘說堪雙虎觀

司空佩已合龍津書攤滄海來千里曲奏陽春和幾人
不是高齋頻下榻鬢毛偏厭雪花新

種山對雨東林大合用山亭秋集來韻

西風吹雨暗城頭囊裏無衣怯素秋蓮社不妨彭澤醉
銅鞮偏憶習池遊行歌却笑空彈鋏作賦何緣共倚樓
河漢盈盈分一水天孫猶自望牽牛

壽鄭雪窻九袞詩

谷口棲遲海鶴姿賓筵抑抑武公詩家傳通德薰蘭佩

世重明經擢桂枝
九轉丹成疏葛井
千鍾酒熟醉蓬池
滿堂戲綵椿增壽
更誦南山採紫芝

東黃于雍

日夕下帷不厭貧
諸生似爾氣嶙峋
春城幾度逢傾盖
藝苑何人悟斲輪
豹隱深林文欲變
龍蟠大海性難馴
東籬濁酒花饒笑
遲爾停梳訪隱淪

客中書懷兼憶舍弟宗齊

細雨孤燈獨掩扉
客愁長與故山違
一官自笑萊蕪甌

九月誰憐薜荔衣龍臥合吟梁父去鳳衰莫遣楚狂譏
南鴻不見雲中度魂斷天涯尺素稀

送方子及謫滇南

天涯宦跡笑蹉跎驥服鹽車墮淚多一代風流淹省署
千山雨色度關河滇池鯨甲隨波動閩海鴻書隔歲過
若祀碧雞金馬後漢廷遲爾頌中和

其二

一謫梁州萬里天馬嘶烏道白雲懸恢諧誰復憐方朔

寂寞還應守太玄山鬼西南窺虎穴夜郎風雨嘯龍泉
淒涼漫擬投湘賦宣室恩深召對年

贈徐方伯子與

青蘿別館播清芬當代才名屬使君貫日虹飛燕市筑
運風聖滅郢人斤豫章榻滿西山月彭蠡風搖北渚雲
不是尋常來問字桓譚欲識草玄文

題北臺圖

越王山下石為臺仲蔚蓬蒿倚石開竹裏清陰搖片月

雲間秀色射三台
帆檣遠近當牕出
島嶼微茫入檻來
寂寞一區玄草在
問奇倘許破蒼苔

登八角樓

九峯雨歇澹浮烟
樓俯孤城列嶂前
臨水客停青雀舫
倚闌鳥度白雲天
囊中誰拾金光草
簾外長飛玉乳泉
龍伏寒潭餘劍氣
清光夜耿斗牛邊

題芙蓉園

公子園門邸第東
清光花豈百花同
揮毫香滿金莖露

把酒涼生玉佩風，鄴下客飛清夜蓋。
淮南日詠小山叢，霓裳何似天孫錦機上。
芙蓉集更工。

重入武彛

九曲溪頭泛釣槎，尋真重到赤松家。
藤蘿面面清陰合，鸞鷟亭亭霄漢斜。
杖曳仙人遊五岳，詩裁玉女獻三花。
鼎中龍虎長生訣，乞與狂夫度歲華。

贈陳公望長君子卿

名翰臣

金羈遙騁帝京塵，雨歇江門柳色新。
共覩臨池毛是鳳。

更誇解佩玉為人星分太乙青
藜夜花映長楊彩筆春
不待青雲吹狗監君王親問漢詞臣

得蕭漢卿詩却寄

老去棲遲五柳門雙魚誰復寄江村
數行忽枉懷人句
多病新開對月樽
海上甘棠歌父老天涯芳草怨王孫
風流舊結青溪社萍梗重逢未可論

寄武昌鄭觀察

海上風流一使君
聲華籍籍漢廷聞
登樓長嘯三山月

作賦還凌七澤雲，建節暫辭鵷鷺侶。
停車偏問鹿麋羣，臨歧不盡相逢興。
那得談詩坐夜分。

題六橋圖

為愛杜陵詩興豪，浣花橋畔草堂高。
沙堤垂柳移三竺，海島橫雲駕六鼇。
波蕩樓臺虹飲澗，聲聞霄漢鶴鳴臯。
明時空把中流柱，偃蹇江潭見楚騷。

贈王百穀

嗟君早歲擅詞場，偃蹇於今鬢有霜。
才子雲間高二陸，

名家江左讓諸王山含秋色丹楓老水繞城隅匹練長
不識東南文物地風流誰復得卿狂

答鄭山人

海上棲遲漸白頭垂綸只合老滄洲宣城聊訪青山去
函谷還瞻紫氣浮落落風塵誰下榻蕭蕭秋色獨登樓
多君徑寸珠相贈萬里江天載月遊

登喝水巖同鄭文蔚賦

名炫少司馬岳曾孫

看山何處結幽期為道參差藍筍移地似支堤分鷺嶺

水從阿耨卜龍池經殘白馬誰傳偈石剩青蓮好賦詩
一嘯泠然風萬壑不知身世在須彌

壽林母

彩婺輝輝映北堂承歡戲舞日初長文章五色聯華萼
環珮千年集鳳凰果獻蟠桃堆玉案香飄鼓桂襲霓裳
翩翩青鳥前為壽春酒瑤池樂未央

和鄭觀察士元聞報述懷

二首

谷口歸耕舊隱淪棲遲不復嘆前薪文章欲廣江潭賦

冠蓋寧奔宛洛塵已悟浮華歸覆鹿曾題封事上批鱗
柴門莫道無車馬五柳依然不厭貧

其二

誰家招隱小山東豈為淮南桂樹叢合浦珠還偏按劍
蒼梧鳥盡却藏弓高陽官罷名逾起哀郢歌殘思不窮
藻鑑縱教遺五咏七賢早已重山公

題鄭氏秀遠樓

樓閣凌空勢不羣萬家烟樹望中分杯搖河漢南山色

劍倚崆峒北斗文海氣散為三伏雨天風吹落九華雲
芙蓉采得堪誰贈醉倚雕欄到日曛

送陳大宗伯還山

鳳鳴阿閣正雛雛何事隨風下九重豈為文章傾絳灌
遂令禮樂失夔龍潞河水解浮仙棹吳苑風高憶禁鐘
歸向東山營別墅臥看紅日起高松

別黃白仲

諱之璧
會稽人

裘自蒙茸劍陸離一尊臨別淚雙垂傷時書敢懷孤憤

去國歌堪託五噫天際愁魂青草斷山中歸夢白雲知
故人回首風塵隔把臂江湖未有期

登泰山 二首

元君禮罷閱秦碑長嘯天門駕赤螭蒼海一杯簷際落
齊州九點鏡中窺白雲不散丈人石青鳥還來王母祠
漢主若求封禪草文園消渴老明時

其二

岱宗東望翠微重曳杖初聞縹緲鐘半嶺烟霞迷漢時

四時風雨咽秦松
緱山直跨仙人鶴
函谷遙瞻柱史龍
七十二君呼不起
安期何處采芙蓉

寄周公瑕

名天球篤志古學
善大小篆隸行草

風塵誰不愧移文
江左高標獨有君
賦就何曾逢狗監
書成堪自換鸞羣
尋僧行踏寒山月
采藥還乘角里雲
海上窮愁知己少
雙魚莫遣不相聞

答林德夫余邦彥海陵見招之作

燕市歸來一狗屠
忽看尺素到江湖
流言萬里悲生死

落魄千金散有無吳會川原雲獨往海陵風雨鴈相呼
莫愁龍劍終難合翹首延津氣不孤

賦得西極馬送許靈長北上

靈長關西人

宛馬如龍貢漢家方瞳紫焰應星華追風不獨驕千里
顧影居然錯五花塞上悲笳寒薊月田中飛檄亂胡沙
憑誰一掃煙塵淨龍種由來產渥洼

寄余彥綸侍御

諱嘉詔號斗南嘉靖乙丑聯捷官監察御史

驄馬驕嘶向故林秋風分手到如今羅浮月滿梁間夢

大庾花開雪裏心
白簡風霜推柱史
青春服食解朝簪
東山不久徵安石
莫負蒼生便陸沉

仙霞道中同馬從甫作

海上仙蹤已杳然
羣峰猶自插遙天
路疑九折羊腸斷
雲自孤飛馬首懸
厭說江湖風雨惡
愁聞吳楚甲兵連
淒淒不是憂時者
訪道名山有夙緣

和李本寧元夜集伯仁西園觀燈

參差朱邸與雲齊
華館還開闥苑西
發篋有珠皆照乘

校書無閣不燃藜
烟花影落春星亂
歌吹聲騰夜月低
溫洛榮河偏此地
舊遊那復問金閨

其二

笙歌何處燕嘉賓
公子西園夜色新
畫棟光分滄海月
華堂香散洛京塵
門臨榮戟多嘶馬
花簇樓臺欲媚人
不唱清平供奉曲
誰知金粟是前身

題內卿王百尺樓

百尺樓開霄漢斜
氣吞河嶽萬人家
夜寒星斗羅朱戟

日靜烟霞護絳紗閣上圖書藏二酉空中鸞鶴駐三花
仙人總是樓居者玉女凌風進紫霞

春日魯陽王別業應教

如雲別館象蓬萊醴酒多緣上客開招隱有山皆桂樹
披襟無日不蘭臺河間禮樂三雍對鄴下文章八斗才
梁苑風流還授簡共誇詞賦接鄒枚

羣玉山房雅集和陳宗伯韻

一丘曲折碧山餘繫纜同過木石居蓮社已招彭澤宰

桃源還問武陵漁
烟籠高閣花陰薄
日射寒潭竹影虛
最愛門庭堪藉草
莫教穉子帶雲鋤

秋夜同屠子卿朱汝脩集宋忠甫邸第分得含字
隱隱樓臺紫氣含
上公愛客懶朝參
何論十日平原飲
且聽千秋碣石談
舞奏陽阿傾薊北
歌翻子夜入江南
明珠直射城頭月
誰向驪龍頷下探

題蘭亭

永和遺跡豈銷沉
載酒蘭亭恰賞心
巖壑一時勞應接

壺觴異代感登臨
籠鶯池在迷春草
巢燕堂空見竹林
若集羣賢修禊事
還憑彩筆勒山陰

秋日集羣玉山房和林文學韻

曾是南塘第五橋
木蘭陂接海門潮
夕陽隔竹紅將斂
古柏經秋翠未凋
一水葭蘼游欲溯
小山桂樹影堪招
銜杯醉殺江天月
厭說歸航十里遙

冬日西巘燕集分得陵字

岵峩樓閣白雲層
何意龍門客並登
望入烟蘿山似黛

歌翻金石酒如澠
堦前五露榮
鼓桂坐上春風盛
朗陵短髮蕭然狂
不厭扁舟雪夜興
堪乘

秋日同林充勲王
玉生徐惟起曹能
始僧如瀚集
平遠臺

漠漠城頭澹遠天
登高仍集竹林賢
沙邊鷗鷺衝殘雨
樹裏樓臺隱暮烟
白髮愁來偏中聖
青山到處合逃禪
不妨乘興邀明月
秋水芙蓉正可憐

送鄧宏載之京

蕭蕭萬樹冷西風使者乘輅入漢宮
鵲五雲瞻薊北鱸魚八月別江東
河橋曉露沾秋草驛路寒砧亂朔鴻
作賦仙郎鳴佩去南天翹首思無窮

李伯承招集北郭別業同楊道行作

尚璽何年謝九重亭開濮水寄仙蹤
池邊白幘迎山簡坐上青尊對李邕
秋老郊原雲氣薄菊明臺館露華濃
不禁飛動談詩興遮莫孤城起暮鐘

贈居易叔

可是吾家舊阿湛風流亦自見崎嶇新詩似錦驚人嫩
濁酒如澠酌客深花外薰風吹度曲竹間明月照開襟
年來小阮踈慵甚徙倚相看愛入林

秋夜登元武臺

仙壇縹緲接瑤京地盡東南一望平萬派溪流奔巨壑
千重樹色隱孤城蟾蜍倒掛窺金鏡沆瀣低垂酌玉衡
莫訝荷衣輕謁帝雲門欲聽步虛聲

郭宗舜過訪鳳山寺

雙林過雨亂飛花草綠空門一逕斜折角有巾迎郭泰
問奇無字答侯芭鳳凰秀色開方丈薝蔔微香散法華
白社風流尊酒在攢眉那復似陶家

舟中寄別諸同社

四首

北風吹鴈客辭家厭說東籬菊正華幾度寒雲生古渡
半江落日澹平沙范丹不問塵中甌潘岳偏愁鬢裏華
妬殺舊遊諸俠少月明何處聽琵琶

其二

慷慨行歌向越州故人臨別問刀頭酒醒馬上鍾山暮
葉落帆前岳水秋衣化緇塵寒未改珠懷明月暗誰投
題詩莫笑飄零客禽慶初為五岳遊

其三

黃田驛口水粼粼況復交遊泣別辰千里河山愁不住
一尊風雨夢相親思萼有客三江去種秫無田五柳貧
秋草淒淒雲漠漠可能不憶竹林人

其四

一溪流水暮雲天津口停橈客未眠壯士吹笳防睨
佳人擣練怨嬋娟踈狂字滅三年刺悲憤歌殘九辨篇
何似山中歌寂寞閉門惟草子雲玄

送陳宗舜直指入朝

野棠春盡發江城飛旆看君入漢京花裏鳴珂驄馬去
日邊持斧繡衣行烽烟遠塞逢多事慷慨中朝起大名
海上窮交何所贈燕山一片白雲情

春日登武寧樓同黃克衢作

樓控青山入望遙
移尊選勝趁花朝
九華翠濕仙人掌
千樹寒生玉女標
松柏春晴喧鳥雀
闔門日落見漁樵
狂來欲跨雙龍去
閭闔班中問九霄

和陳堯勲遊赤壁

百萬騰驤赤壁開
中原虎視霸王才
舳艫風猛連雲沒
烏鵲枝空帶月回
珠抱寒潭龍獨臥
書沉遠浦雁還來
臨流漫說千年事
且罄樽前濁酒杯

答思甫宗侯人日見懷之作

身世飄飄水上萍何人道是少微星
年華未報千門柳物色初看七葉蓂
愁徧江河詩不廢夢回鄉國酒初醒
梁園又見王孫草日逐東風刺眼青

牛渚磯早眺同吳翁晉梅季豹作

曙色蒼蒼望不迷秋深山徑草淒淒
烟消海島蛾眉出日挂樓臺蜃氣低
峽口寒濤驚躍馬水中幽怪避燃犀
裁詩誰復披宮錦鸛雀踈林莽自啼

贈陳少宰公望

諱經邦號肅菴嘉靖乙丑進士官禮部尚書

班高建禮秩春卿水鏡掄才寵聖明地切南宮分曳履
人當北斗重持衡談經虎觀天顏動染翰龍池藻思生
好是平津開閣日茂陵消渴望金莖

贈屠長卿

建章朝罷下彤墀柱笏東曹日賦詩結客已傾燕市俠
為郎還草漢宮儀佩紉澧芷湘靈妬珠握驪龍海若悲
莫是仙才多玩世陸沉金馬有誰知

西湖春泛同屠緯真馮開之徐茂吳黃白仲錢叔

達宋化卿許靈長分得風字

平湖晴日水浮空，載酒看花入鏡中。
城郭烟雲開鷺嶺，樓船簫鼓徹龍宮。
花間列伎春爭麗，柳外聽鶯詞轉工。
別采湘君芳杜佩，夕陽歸棹信微風。

九日黃惟雅招登黃華山同鄭兆聖柯賓朋作

黃華山下白雲浮，愛客攜樽最上頭。
睥睨烟含千樹影，芙蓉風動萬家秋。
寒花色艷凌青女，流水聲長咽紫洲。
此日汪洋情不淺，客中搖落未須愁。

寄龔應身使君

東風東望憶黃華太守風流似永嘉詞賦建安稱作者
循良渤海舊名家喜看夾水雙龍近愁見長空一雁斜
若問狂夫寥廓興一丘猶未臥煙霞

和大宗伯陳公聞倭寇遁歸我師追擊盡復朝鮮
之地志喜韻

遙傳上將臨邊日秉鉞登壇殺氣銷萬虜投戈歸絕域
三軍奏凱徹中朝梯航未必來重譯杼軸何堪盡戍遼

太史直懸千古筆扶桑銅柱轉峒峩

贈何穉孝

南北風塵未可論嗟君何事隱青門
閒居已厲東山操薄譴還懷北闕恩
社結山中時佞佛槎乘海上欲尋源
愁來偃蹇憐同調擬向羊何倒綠樽

寄李本寧觀察

傳聞旌節下巴西天目東南望不迷
彩鷁乘風飛水驛襜帷帶雨憫春犁
停舟訪古過嚴瀨按部探奇入會稽

却憶梁園曾御李，幾回飛夢隔雲霓。

贈少司寇詹爾欽

落魄南來混客星，欲瞻卿月謁階庭。
批鱗殿上傳封事，執法朝中紀御屏。
謝傅東山營別墅，揚雄西蜀著玄經。
即今霄漢虛台鼎，海上顯顯望典型。

題黃惟雅欣賞齋

琴弄胡牀磬，懶敲幽蘭馥。
馥竹蕭蕭圖書四壁留，仙篆
爨鼎千秋應斗杓。
氣溢空中遊汗漫，翼垂海上駕扶搖。

銜杯下榻多情興倚杖重來不待招

林晉伯讀書霞村別業

散帙開軒覽物華新開三徑敞烟霞豈緣葱蒨便看竹
自愛滄浪足浣花門對壺公青入案帳裁織女絳為紗
晴窻草就揚雄賦文似何人薦漢家

陪陳玉叔遊九鯉湖同陳彥冲作

使君飛蓋動山靈九鯉烟霞接幔亭樹綴巖巒空外碧
雲移樓閣鏡中青招來鳬影棲仙洞閱罷鵞羣寫道經

湖水潺湲人不寐，釣天廣樂若為聽。

題九鯉湖水晶宮 二首

崔嵬樓閣俯澄湖，湖上仙人竟有無。
赤鯉何年飛碧漢，白雲猶自滿元都。
寒潭倒影三珠樹，列嶂高懸五岳圖。
即此避秦無不可，風塵容易歲華徂。

其二

脩然長嘯入林丘，峭壁懸崖翠欲流。
萬壑泉奔青靄下，一天月映紫芝浮。
湖中丹竈無今古，洞裏閒雲任去留。

跨鯉仙人何處去且將杯酒洗塵愁

歲暮懷黃惟雅却寄

汝南風度近何如海上棲遲嘆索居青鬢看君工著述
白雲笑我混樵漁千金豈賣長門賦七尺空乘下澤車
歲暮梅花思折贈海門雁斷轉躊躇

寄楊德潤

風流曾識洛陽才一別長安夢幾迴痛哭賈生書未上
反騷揚子賦堪裁孟津水自龍門下苦縣山從鹿邑來

不識趨庭春酒熟憑誰花下罄深杯

薛公儀移樽咸平寺同李少白鄭長玉閔文逸作
漢廷侍從氣翩翩載酒何來繡佛前秋入雙林停白馬
人從三竺禮青蓮旃檀風細仙旛動優鉢花明彩筆懸
莫是詩名陶謝並更憑醉裏一逃禪

留別薛公儀

薊北縱橫結客場山中讀禮罷含香青萍解贈秋如水
白壁投來夜有光籬下寒花供月露天涯落雁帶風霜

問君何日燕山去
枚馬如雲遲建章

喜楊道行徵會濮上呈李伯承穆敬甫陳翼甫

南北無勞斷客魂
靈韃此日屬中原
詞盟已自開城濮
吏隱何妨傲漆園
河上古丘悲帝子
天涯芳草怨王孫
當筵不作長鯨飲
萍梗重逢未可論

穆敬甫以病不赴城濮之會却寄

秋盡文園病未蘇
步兵白眼滯窮途
敢云明月投千里
已見雄風長五湖
瓠子馬沉仙蹕遠
莊生蝶去釣臺孤

君今不入高陽會誰向天涯結酒徒

答穆敬甫

信宿名園嘯薜蘿朝來一騎又相過看君俠氣傾三輔
笑我離愁託九歌雁帶秋聲來紫塞雲含暝色度黃河
花間進酒人無恙曾是雄威細馬馱

題衡山

清秋高躡祝融峰澗道千盤隱萬松日月分明開禹鑿
雲霞迴合蝕秦封簷前喬木巢朱鳥巖下寒湫臥白龍

欲問元纁蒼水使天風吹落半山鐘

酬康孟擔

曾訪狂夫到草堂新詩投贈比琳琅
邀歡却醉桃花酒招隱還歌桂樹章
春盡嚶嚶黃鳥轉雨殘郁郁紫蘭芳
陶然別去青門外流水千山挂夕陽

泊橋李呈方廷對

長安聚首夢中過君自雲霄我薜蘿
抗疏新朝驚絳灌裁詩故里愧羊何
地連吳越長鯨靜春入東南橋李多

握手依然青眼在白頭空自笑蹉跎

贈歐楨伯

二首

羅浮石室採幽芳吏隱何年入帝鄉
六館傳經秦博士
兩都作賦漢仙郎
干將劍在寒斗斗建業臺孤下鳳凰
不識周南留滯者幾回起草奏明光

其二

十年歐冶夢中豪劍氣今看北斗高
合浦雙珠探照乘
曲江一賦壯觀濤
燕臺索駿元千里漢署含香已二毛

多少風塵淪落者誰攜綠綺向君操

同徐茂吳遊白岳信宿紫霄樓

四首

東南真氣抱神臯謁帝重來感二毛塵世漫隨滄海變
名山不改白雲高泉鳴石壁飛寒雨風入松林急暮濤
聞道襄城迷七聖勞生那得解天弢

其二

北斗天高不可從靈巖壁立翠重重松間此日來雙鶴
雲裏何年駐六龍短褐朝元隨羽節空山采秀躡仙蹤

日斜笑倚盧敖杖谷口西風落暝鐘

其三

尋真何必躡崑崙禮罷元壇日欲昏萬壑雲霞封帝時
十洲鸞鶴下天門烏飛敢謂丹砂就書著還瞻紫氣屯
相對高樓清不寐長生有訣細堪論

其四

樓閣峩峩接太虛客來登眺倚蟾蜍齋分玉女青精飯
駕借仙人白鹿車驚驚參差雲外聳芙蓉隱映月中踈

夜闌聽徹鈞天樂剪燭焚香讀道書

送王使君擢霸州兵備道還東省

青陽初轉大梁城尊酒驪歌聽早鶯
海岱東行辭魏國風雲北指護燕京
兩河陰滿甘棠樹三輔烟消細柳營
惆悵臨岐無可贈平原春草日含情

遊少林寺過中嶽時新秋雨霽

秋風乍轉拂行旌迢遞山川雨乍晴
一入祇園瞻面壁更從緱嶺聽吹笙
雲移殿閣諸天靜月挂松蘿二室清

回首年華空荏苒欲棲此地學無生

送王祠部

太行王屋接長安漢署春風入握蘭
丹就神仙辭葉縣詔來禮樂典祠官
卿雲東省花間駐御氣西山馬上看
鄴下故人樽酒別幾回清夜夢金鑾

送黃明立會試

黃花綠酒別河梁射策看君入帝鄉
趙璧光聯千里月鄧林春占一枝香
樓船處處疲南紀鼙鼓年年振朔方

漢苑於今誰諫獵好憑彩筆賦長楊

芝山寺懷黃惟雅

禪關半掩遠囂塵獨坐繩牀笑此身習定不聞招隱客
草玄偏憶問奇人愁看貝葉青山老厭見蓮花白髮新
安得汝南懷叔度汪洋千頃日相親

雨中偕友人自蓬萊驛乘舟謁禹陵

二首

幾度神遊入會稽探奇冒雨越城西舟移古渡疑乘雪
馬避春流惜障泥千載風雲寒碧瓦九歌日月閔元圭

相傳蒼水金書在滿目松蘿鳥亂啼

其二

駐馬山門望翠屏禹陵風雨畫冥冥峰巒迴合朝羣后
松檜參差護百靈輦道草荒嚴伏臘袞衣廟古肅丹青
祖龍亦是東巡者秦望寥寥片石銘

九日陳汝大招集林氏園亭同陳幼孺鄭性之康
孟擔徐惟起素無競分得陽字

招隱城隅一草堂開尊正對菊花黃臺邊薜荔寒秋水

檻外芙蓉弄夕陽雲起三山藏古堞風吹萬籟轉清商
相看不醉茱萸酒鏡裏空餘兩鬢霜

贈稽司理

建安別去動經年此日重逢皎若仙法署有星懸水鏡
官衙無訟挂蒲鞭蘇門訪道疑中散荆土登樓愧仲宣
指日循良膺召對趨朝咫尺奏鈞天

贈劉大參

藩獄提封控上游紫薇丰采冠神州文垂海岳宗齊魯

氣合延津射斗牛行省飛霜清列戟嚴城明月賦登樓
聖朝側席多南顧國計還看借箸籌

送駱明府入計

華殿承恩下建章符分甌越重賢良才工製錦花稱縣
風入鳴琴雪滿堂千里棠陰人祖道五雲春色鳳朝陽
蓼蕭賜燕登歌日青瑣從容拜夕郎

春日盧封君招遊南郊

楊柳青青桃李花逍遙仙杖屬君家南山松柏歌春酒

北闕鸞鸞寵歲華
書報瑤池迎載勝
訣傳勾漏舊丹砂
安期來進如瓜棗
笑指扶桑五色霞

題陸丞相祠

不見南朝帝子家
靈祠猶鎖舊烟霞
龍從玉璽沉滄海
星隕匡門扈翠華
風雨長嘶天外馬
英雄誰斬澤中蛇
即今邊將平沙漠
精爽無勞咽暮笳

送林仲清之貴陽

謁帝新從薊北回
紫薇花下進春杯
褰帷重入要荒地

開府爭推岳牧才
山鬼西南愁按部
夜郎風雨避登臺
天涯見月如相憶
尺素還憑過雁裁

秋日還故園

渡水登山到草堂
田家稻黍喜新嘗
墻邊薜荔秋多雨
池上芙蓉夜有霜
看竹每尋扶老杖
借書先錄養生方
歸來自笑白頭客
况復江南是故鄉

登香山寺

路入香山更逶迤
子魚潭畔葦花陂
鷗鷺水濶憐雙影

鷓鴣風微戀舊枝
白嶼月明漁笛起
碧汀潮打畫船移
幽心惟許山僧會
檻外催春柳自垂

失題

共向山中賦采薇
諸天延眺思依依
輕塵乍合芙蓉冷
片雨初來鶯鶯飛
滄海潮生通鱗井
白雲客到更荷衣
漫遊自愛盧敖杖
擬挾青龍去不歸

七言排律

羣玉山房秋集分得林字

出郭乘舟到竹林張筵高會逗秋陰鶴樓珠樹雲初冷
龍臥寒潭水正深怪石崢嶸窺古洞明霞縹緲散遙岑
歌連遠浦漁郎蘧響雜荒村浣女砧杖曳東山隨著屐
樽開北海共披襟簾前流水雙帆度檻外疎松萬籟吟
楚澤孤臣餐菊賦商山四皓采芝心王家觸目皆羣玉
謝傅摘詞等碎金栗里羲皇稱以上朗陵象緯盛於今
脩然醉後舒長嘯歸棹焉知夜漏沉

春日集鄭仲蔚環翠亭拈四支韻

滎陽誰似鄭當時
愛客開尊花滿枝
檻外翩翩穿蛺蝶
簷前恰恰轉黃鸝
談深揮麈供茶椀
興劇呼盧覆酒卮
風送香爐烟裊裊
春生書帶草離離
遊魚出水爭相沫
歸燕尋巢定不移
李郭神仙元我輩
應劉詞賦總吾師
藉蘭欲待城頭月
刻竹還敲谷口詩
彈鋏歌來狂態發
唾壺擊罷壯心悲
留連醉後忘歸路
倚杖柴門倒接籬

贈子魯金中丞

金公自番攜薯到
閩故薯亦曰金薯

東南王氣鬱如雲
萬里雄才獨見君
節鉞光懸金鵲印

樓船聲震水犀軍星羅霄漢勾陳色風動華夷露布文
城郭吹笳清瘴癘轅門建纛播氤氲三章頻按豺狼吏
片刺偏容鹿豕羣下士時時勤吐握行歌處處樂耕耘
玉衡一代工檣藻銅柱千秋重勒勲自曳長裾趨幕府
草茅何幸沐餘芬

重陽前一日周元孚邀同鄔汝翼謝少廉於衙齋
言別時元孚奉使還楚

楓葉蕭蕭雨乍晴悲秋偏愛集同聲東南信美忘賓主

詞賦爭雄總弟兄，節逼重陽萸已熟。
露溥三徑菊初榮，傳杯忽動登高興。
把袂多含送遠情，萬戶天臨雙杵動。
九江雲帶片帆輕，鏡中鬢為憂時改。
馬首塵來候吏迎，一入西陵詢故舊。
幾迴北闕戀承明，君家江左風流在。
春水樓船下石城。

和陳宗伯九鯉湖韻

襄城問道意無窮，杖屨逍遙洞壑中。
漢主虛開遊獵館，秦庭何重望仙宮。
披雲獨往窺丹竈，觀瀑相攜坐玉壺。

鸞鳳聲從蘇嶺下桑麻路與武陵通霞明亂葉秋光晚
月浸澄湖夜色空揮麈談時星歷歷銜杯藉甚草茸茸
詩成笑倚三珠樹筆落雄生五彩虹騎鶴浮丘應有待
飛鳧葉縣未能同文園渴矣懷餐露鄭圃冷然快御風
讀罷淮南招隱賦溪山吾欲縮壺公

壽周公瑕

共羨周郎冰雪姿早從丘壑傲明時洛陽紙似三都貴
吳下裘仍五月披棲鳳有時多種竹籠鷺到處擅臨池

論文意氣醇堪醉顧曲風流調不移
芝自東山寧角里棗從南海乞安期
喬家春色花爭麗歲歲儂歌進酒卮
冬至汪伯玉招集大函館同屠長卿
徐茂吳吳少君龍君御吳叔嘉汪仲淹
仲嘉潘景升暨悅公得燈字


大函別館勢峻增玳筵開客並登
笑指天都宜盼望坐依霄漢若騫騰
談揮玉麈紛成綺酒進金卮湧似澠
簷際星垂雙佩劍尊前花艷九華燈
石門並列山中相

栗里還招社裏僧飛蓋三更驚月出揮毫四座蔚雲興
已誇兔苑稱枚叟更喜龍門御李膺文變深林甘隱豹
翻搏北海快飛鵬賦成但乞題元晏禪定何疑出上乘
梅柳將春凌積雪松筠向晚傲層冰朗陵象緯書堪紀
謝氏池塘句可憑經著五千浮紫氣杖攜太乙失蒼藤
黑貂敝矣悲羈旅皓首陶然慶得朋北斗闌干歡未歇
歸來萬井旭東升

西亭宗正輓詩

漢家孫子真龍種，驤裏名傳萬里餘。
桐葉分封元帝胄，桂叢招隱即仙居。
承恩擬效三雍對，紀事還裁七畧書。
梁苑邀賓頻授簡，彛門結客數停車。
青藜午夜光侵閣，玄草丁年靜掩廬。
幸舍何須彈短缺，及門多是曳長裾。
脩然觀化辭塵世，忽爾乘雲接太虛。
何處高岡翔鸞鷟，一時荒草掩璫璣。
風寒北郭傳經帳，塵暗西亭列綺䟽。
維嶺吹笙聲渺渺，芳園為夢蝶蘊蘊。
千秋松檟培金谷，三殿絲綸下玉除。
同姓覃恩偏獨渥，諸侯樂善果誰如。

麒麟夾道開蒿里
巔巔豐碑撰石渠
御氣多應遊五岳
招魂邨用擬三閭
九天已化崑崙鶴
八極疑乘渤海魚
自有劉歆堪接武
高山仰止獨愁余



薛荔園詩集卷四